

Зоя Богомолвалы – 100 ар

Солэн дорез – Удмуртия

Йоскалык библиотекаын ортчиз Зоя Богомолова литературоведэз буре ваён жыт. Татчы люкасыкызы соин чощ ужам адямиос, писательёс, критикъёс.

Зоя Богомолвала вордскиз Оренбург улосын. 1948-тй арын Ставропольсь пединститутэз йылпумъяса но Москваысь аспирантураын дышетскыса, Зоя Богомолвала ужал Муромысь пединститутын. Нош 1958-тй арын вуиз Иже. Куке З. Богомолвалаез Удмуртиез ужаны отызы, со Муромысь библиотекаысь шедьтйз М. Петровлэсь «Вуж Мултан» но Г. Красильниковлэсь «Тонэн кылысько» книгаосэс. Соосты зуч кылын лэдиз. «Мон та кык произведениосъя валай, мар со сыче егит удмурт литература», — шуиз бёрысь тодосчи.

Собере писательёсын, тодосчиосын тодматскон, валче ужан, егит гождьськысьёслы юрттон, уно книгаос, наука статьяос гожтон — вань та ужез 50 арлэсь кема быгатыса нуиз З. Богомолвала. Удмурт литература но Удмуртиысь зуч литература солэн улоназ валтйсь инты басытйзы.



СССР-ысь писательёслэн 5-тй съездзы: СССР-ысь Кун премилэн лауреатэз, кылбурчи Алексей Сурков, Зоя Богомолвала, УАССР-ысь Кун премилэн лауреатэз Геннадий Красильников но солэн кузпалыз Зинаида Красильникова. 1971-тй ар.

Ваньмыз верало З. Богомолвалалэсь узыр библиотекаэз. Автографъёсын книгаос, чеберлыко произведениос, научной изданиос сяна, одйг жажыяз сыло вылэм детективъёс. Жаде ке, Зоя Алексеевна детектив лэдизе вылэм, йырме, пе, озы шуэтскытйсько.

История наукаосъя доктор, писатель Владимир

Владыкин верамъя, асьмеос сокем дышим ни вал, котькуд ужрадэ Зоя Богомолвала пырыське, котькыче пумиськонэз чебертэ шуыса, соин ик али шуак паймоно кадъ: малы со туннэ татын өвёл.

— Сергей Михалков писатель куке но шуиз: шудо луыны кулэ литература, кытын чебер кышномурт чебер

вера со литература сярысь. Зэм но озы. Зоя Богомолвала сыче адями вал: солэсь уродгес вераськем уг поты вал, нош солэсь чебер вераськыны уг пёрмы вал, — тодаз вае Владимир Владыкин.

Удмурт кун университетсь профессор, химия наукаосъя доктор Сергей Решетников Зоя Богомолвалаез

нырысьсэ адзыкуз, малпам: ма, та «Тихий Дон» киноысь Аксиныя ук. Зоя Алексеевна пальпотйз: ма, мон Оренбургъёсысь казачка ук...

Удмуртиысь калык художник Пётр Ёлкин но тодаз вайиз, кызы соос эшгьяськызы та дано кышномуртэн:

— Туж потэ вал солэсь портретсэ гожтэме, но мон егит вал бере, ой дйсьты дораз маткытыны-юаны. Шедьтй мукет амал. Кёня ке арня чоже Зоя Алексеевна лэксэз лыктйсько, бер парта сёры пуксысько но шып гинэ суредасько вал. Собере ини тодматским но, эшгьяським но, трос пол монэ, мильым пыжыса, куно карылйз.

Та жытын ик Удмуртиысь культура министр Владимир Соловьёв эчкылаз Зоя Богомолвала нимо премиен пусьмёсты. Библиотекаос пёлын вормиз Воткинскысь ёрос лэдизськонни «Вотка ёрос — дано адямиослэн но событиослэн музеймы» проектсэз улонэ пычатэмзы но Пушкинской карта я умой ужамзы понна. Нош «Литературной критика» номинациын премиез басытйз литературовед, филология наукаосъя кандидат Александр Шкляев.

История, кылы но литература Удмурт институтын архивысьтыз



Удмуртиысь наука удысысь дано ужась Александр Шкляев:

— Зоя Богомолвалэн критикаез гажась вал, уго талантэз утыны кулэ. Огпол писательёслэн заседаниязы солы кыче ке премия сётйзы. Огез писатель шуэ: мар весь Зоя Алексеевналы но Зоя Алексеевналы, сётэ ни мукетъёсызлы но. Зоя Алексеевна солэн пумитаз шуиз: пие, эн сюлмаськы, тыныд З. Богомолвала нимо премия сётэзы.



Россиысь культура удысысь дано ужась Анетта Сидорова:

— Зоя Алексеевнаез нырысьсэ адзи семинарын, сое нуиз тодосчи Кузьма Куликов. З. Богомолвала лэдиз милемлы лекция. Ми, нылкышноос, номыре ём кылэ шораз учконъямы: дйськутсэ, туссэ, йырсиэ. Сыче со чебер вал. Зоя Алексеевна кошкез, нош К. Куликов милемыз тышкаське: тй одйг ке но книга лэдземын-а, өвёл-а, малы юан од сётэ?

«Асьме писательёсмы востэмесь...»

Тодосчиос, кылчиос, писательёс сэрттйзы-пертчизы З. Богомолвалэсь творчествозэ, вераськызы, кыче пыты кельтйз та тодосчи Удмуртилэн литератураен но культураен герзаськем улоназ.

Глазовысь В. Короленко нимо пединститутлэн Ижысь филиалэзлэн кивалтйсьез, филология наукаосъя кандидат Светлана Скопкарёва верамъя, Зоя Богомолвала удмурт литературоведениез зол азинтйз:

— Зоя Алексеевна трос лэсьтйз, Россиысь

кивалтйсьёс, писательёс, тодосчиос Удмуртиысь гождьськысьёслэсь творчествозэс мед синйылтозы шуыса. Солэн тыршеменыз валче Москваын Удмурт литературалэн нуналъёсыз ортчылыны кутскызы, асьме писательёс печатласькызы Москваын потйсь газет-журналёсын. Солэн ик йыраз малпан лыктйз: поттоно удмурт писательёслэн творчествозылы сйзем бичетьёс. Озы кылдйз быдэс серия — Кузёбай Герд, Кедр Митрей, М. Петров, М. Коновалов, Г. Красильников, Ф. Васильев, М. Лямин, С. Широбоков но

мукет писательёс сярысь книгаос. Зоя Алексеевнаез туж сюлмаськытэ вал кылысь кылэ берыктон уж. Со шуылйз: национальной литературалэн баджым кайгуэз — переводчикъёс өвёл. Макем баджым ыштон со, куке анай кылын гожтэм эч но чебер произведениос дуннеез уг аджо, калыке уг пото.

Ачиз З. Богомолвала шарысьтымы одйг писателез но, дыр, синйылтытэк өз кельтылы. Та пумысен литературовед тазы гожтэм вылэм: «Тросэз соос пёлысь — баджым устоиос, тыршыса

но чидаса ужало, уно гождьсько, но туж ожит эч кыльёс кыло. Соин ик мон соослы юрттыны тыршысько, куддыр визь-нод сётйсько. Асьме писательёсмы востэмесь, соос литературае уг чуртнасько, асьсэлэсь творчествозэс ушгьяса уг уло, кепыраса возьмало, мар шуозы меда мукетъёс».

История, кылы но литература Удмурт институтысь архивъя но библиотека фондъёсыя отделысь валтйсь архивист Татьяна Пантюхина ивортэмъя, институтын утысько Зоя Богомолвалэн 100 пала рукописьёсыз,

гожтэтъёсыз но туспуктэмъёсыз.

— Та архивамы тодосчилэн документъёсыз шодтэк шорысь шедизы. Зоя Алексеевна эшез но юрттйсьез Тамара Вахрушева институтамы вазиськиз 2020-тй арын, З. Богомолвалалэсь кылем рукописьёсэ но туспуктэмъёсэ учкыны курыса. Баджым архивзэ Т. Вахрушева келяз солэн Москваысь чыжы-выжыосызылы, но татчы но трос кагазъёс кылызы на. Озы 2021-тй арын архивамы 100 пала документ интыяскызы, — шуэ Татьяна Пантюхина.